



Terenga 2: Hōtaka 11 - wareware

E te makiu, e te tīpatere, tēnei te ringa hariru o AKO te toro atu nei ki a koutou, kia noho tahi ai tātou ki runga ki te paepae whakarauora i te reo Māori.

Hei Mahi Whakarongo

Nā tētehi o te whānau Tamepo i tuku mai te kiriata mō tēnei hōtaka hei mātakitaki mā tātou. Ko ētehi o ēnei tāngata kua ngaro i te tirohanga kanohi, tae atu ki te kaikōrero, ki a Tame Te Maro, i tū ai ki te poroporoaki i a Arihia Tamepo i tana uhunga i te marae o Iritekura i te whanga o Waipiro. Whakautua ngā pātai ka whakataurite ai i ō whakautu ki ā ngā ākongā o AKO.

1. Tuhia ngā kupu o te waiata. E rua ngā whiti.
2. Ko te 'aroha' i waiatahia ai, he aroha harikoa, he aroha pōuri rānei?
3. He aha koe i whakaaro pēnā ai?

He Whakamārama

Ka taka te kupu 'wareware' ki raro i te maru o ngā momo kupu matua e rua. Koirā i rua ai ngā whakamahinga rerekē o tēnei kupu. Tuatahi – ina whakamahia te kupu 'wareware' hei tūāhua, kāore e tāpirihia he whiore hāngū. Waihoki, mehemea e hiahia ana koe ki te tohu i te pūtake o taua āhua, arā o te 'wareware', me whai tērā i te kupu 'i'. Tirohia ngā tauira e whai ake nei:

- a) Kua wareware i a koe tō pōtae? *Have you forgotten your hat?*
- e) I wareware i te kaiako tāna pēke. *The teacher forgot her bag.*

Tuarua – ina whakamahia te kupu 'wareware' hei tūmahi, ka taea te whakahāngū.

- i) E kore te hunga i haere ki te pakanga e warewaretia. *Those who went to war will never be forgotten.*
- o) I warewaretia tana koti. *He forgot his coat.*

Tirohia hoki tēnei tauira:

- u) Kaua e wareware ki te raka i te kūaha. *Don't forget to lock the door.*

He pai tēnei whakamahinga mehemea e hiahia ana koe ki te whakamaumahara i te tangata ki te mahi i tētehi mahi.

Hei Manatu

tutuki = to be accomplished **tūtuki** = to clash, collide

Kaua e wareware! He rerekē noa ake te tikanga o ēnei kupu e rua. Kia tika te whakahua!

Hei Mahi

Whakamāorihia ēnei rerenga:

1. Don't forget to ring your mother.
2. He forgot his umbrella.
3. I'll never forget you.
4. The car crashed into the pole.
5. I'll achieve my goals this year.

Whakautu:

1. Kaua e wareware ki te waea atu ki tō whaea.
2. I wareware i a ia tana hamarara.
3. E kore koe e wareware i a au. / E kore koe e warewaretia e ahau.
4. I tūtuki te waka ki te pou.
5. Ka tutuki i a au aku whāinga i tēnei tau.